




唐才子傳上

土岐文庫  
文庫17  
W211  
1





文庫 17  
W211  
1

正保刊唐才子傳  
土岐老先生

嶺城寬

持贈

昭和六十年二月一日贈  
土岐善吉唐氏寄

010185192658

長息藏寶



唐才子傳卷第一目錄

- |     |     |     |     |
|-----|-----|-----|-----|
| 王績  | 崔信明 | 王勃  | 楊炯  |
| 盧照隣 | 駱賓王 | 杜審言 | 沈佺期 |
| 宋之問 | 劉希夷 | 陳子昂 | 李百藥 |
| 李嶠  | 張說  | 王翰  | 吳筠  |
| 張子容 | 李昂  | 孫逖  | 盧鴻  |
| 王泠然 | 劉昫  | 王灣  | 崔顥  |
| 祖詠  | 儲光羲 |     |     |

不言山泉外







而已。翹尋其來國風雅頌，開其端，離騷招魂，放厥辭。蘇李之高妙，足以定律。建安之道壯，繁尔成家。爛熳於江左，濫觴於齊梁。皆韻祖，公流坦然，明白鏗鏘。愧金石，炳煥却丹青。理窮必通，因時為變。勿訝於枳橘，非土所宜。誰別於涓涇，投膠自定。蓋係乎得失之運也。唐幾三百年，鼎鐘挾雅道，中間大體三變。故章句有焦心之人，聲律至穿揚之妙。於法而能備，於言無所假。及其逸度，高標波遺，韵臨高能。賦閑暇，微吟舊格，近體古風。樂府之類，芳沃當代。響起陳人，淡寂無枯悴之嫌。繁藻無淫妖之忌。猶金碧助彩，官商自

協端，足以仰結先塵。俯謝來世，清廟之瑟薰風之琴。未或簡其沈鬱，兩晉風流不相下於秋毫也。余遐想高情，身服斯道。究其梗槩，行藏散見，錯出使賢於述作。尚昧音容，洽彼姓名。未辨機軸，掌切病之頃。以端居多，暇害事都損。游目簡編，宅心史集。或求詳累帙，因倫先傳。撰擬成篇，班班有據。以悉全時之盛，用成一家之言。各冠以時，定為先後。遠陪公議，誰得而誣也。如方外高格，姓名散人上漢。仙侶幽閨，綺思雖多。微考實故，別捨論之。天下英奇所見，畧似人心相去。苦亦不多。至若觸事興懷，隨附篇末。異方之士，弱冠



裴然初於見聞豈所能盡敢倡斯盟尚賴同志相與  
廣焉庶乎作九京於長夢詠一代之清風後來奮飛  
可畏相激百世之下猶期賞音也傳成凡二百七十  
八篇因而附錄不泯者又一百二十家釐爲十卷名  
以唐才子傳云有元大德甲辰春引

### 六帝

夫雲漢昭回仰彌高於宸極洪鐘希叩發至響於咸  
池以太宗大縱玄廟聰明憲德文僖睿姿繼挺俱以  
萬機之暇特駐吟情奎壁騰輝交龍浮彩寵延臣下  
每錫贈酌故上有好者下必有甚焉者矣

### 王績

績字無功絳州龍門人文中子通之弟也年十五遊  
長安詣揚素坐服其英敏目爲神仙童子陷大業  
未舉孝廉高第除秘書正字不樂在朝辞疾復授揚  
州六合縣丞以嗜酒妨政時天下亦亂遂托病風輕  
舟夜遁歎曰細羅在天吾將安之乃還故鄉至唐武  
德中詔徵以前朝官待詔門下省績弟靜謂績曰待  
詔可樂否曰待詔俸薄况蕭瑟但良醞三斗差可戀  
耳待詔江國公聞之曰三斗良醞未足以絆王先生  
特判日給一斗時人呼爲斗酒學士貞觀初以疾罷



歸河渚間有仲長子光者亦隱士也無妻子績愛真  
真遂相近結廬日與對酌君有奴婢數人多種黍春  
秋釀酒養鳧鴈蒔藥草自供以周易莊老置牀頭無  
他用心也自號東臯子雖刺史謁見皆不答終於家  
性簡微好飲酒能盡五斗自著五斗先生傳彈琴為  
詩著文高情勝恣獨步當時撰酒經一卷酒譜一卷  
李淳風見之曰君酒家南董也及詩賦等傳世  
論曰唐興途事業治日少而亂日多雖草衣帶索牢  
得安居當其時遠釣弋者不登山而逃海斯德而隱  
者矣自王君以下幽人間出皆遠騰長往之士危行

茶

氣

其

言綴直撥禍機糠覈軒冕掛冠引退往往見之躍身  
炎冷之途標華黃綺之列雖或累聘丘園勉如冠佩  
適足以速深藏於藪澤耳然猶有不能逃白刃死非  
命焉夫蹟晦名彰風高塵絕豈不以有翰墨之妙騷  
雅之奇美哉文章為不朽之盛事也耻不為堯舜民  
學者之所同志致君於三五懦夫尚知勇為今則捨  
聲利而向栖々鹿冠烏几便於錦繡之服柴車茅舍  
安於丹雘之厦藜羹不糝其於五鼎之味素琴濁酒  
和於醇飴之奉樵青山漁白水足於佩金魚而紆紫  
綬也時有不同也事有不侔也向子平曰吾故知富

才子卷一

四



不如貧貴不如賤茅未知死何如生此達人之言也  
易曰遯之時義大哉

### 崔信明

信明青州人少英敏及長強記義文章高孝基語人  
曰崔生才冠一時但恨位不到耳隋大業中為堯城  
令竇建德僭號信明弟仕賊勸信明降節當得義官  
不肯從遂踰城去隱太行山中唐貞觀六年詔即家  
拜興勢丞遷秦川令卒信明特才蹇兀嘗自矜其文  
時有揚州錄事參軍榮陽鄭世翼亦驚倨忤物遇信  
明於江中謂曰聞君有楓落吳江冷之句仍願見其

餘信明欣然多出舊製鄭覽未終曰所見不逮所聞  
投卷於水中引舟而去今其詩傳者數篇而已

### 王勃

勃字子安太原人王通之諸孫也六歲善辭章麟德  
初劉道祥表其材對策高第未及冠授朝散郎沛王  
召署府修撰時諸王鬪雞會勃賦為文檄英王雞高  
宗聞之怒斥出府勃既廢客劍南登山曠望慨然思  
諸葛之功賦詩見情又嘗匿死罪宮奴恐事洩輒殺  
之事實當誅會赦除名父福時坐是左遷交趾令勃  
往省觀途過南昌時都督閻公新修滕王閣成九月



九日大會賓客將令其塔作記以誇盛事勃至入謁  
帥知其才因請為之勃欣然對客操觚頃刻而就文  
不加點滿座大驚酒酣辭別帥贈百緡即舉帆去至  
炎方舟入洋海溺死時年二十九勃屬文綺麗請者  
甚多金帛盈積心織而衣筆耕而食然不甚精思先  
磨墨數外則酣飲引被覆面卧及寤援筆成篇不易  
一字人謂之腹藁嘗言人子不可不知醫時長安曹  
元有秘方勃盡得其術又以魏洲多藥草求補參軍  
倚才陵藉僚吏疾之有集三十卷及舟中纂序五卷  
今行於世○勃嘗遇異人相之曰子神強骨弱亦清

體體骨虧陷目睛不全秀而不實終無大貴矣故  
其才長而命短者豈非相乎

### 楊炯

炯華陰人顯慶六年舉神童授校書郎永隆二年皇  
太子舍奠表豪俊充崇文館學士後為婺州盈川令  
卒炯恃才蕙傲每耻朝士矯飾呼為麒麟或問之  
曰今假弄麒麟戲者必刻畫其形覆驢上宛然異物  
及去其皮還是驢耳聞者甚不平故為時所忌初張  
說以箴贈盈川之行戒其苛刻至官果以酷稱炯博  
學善文與王勃盧照隣駱賓王以文辭齊名海內稱



四才子亦曰四傑効之者風靡焉烟掌謂吾愧在盧  
前耻居王後張詵曰盈川文如懸河酌之不竭耻王  
後愧盧前謙也有盈川集三十卷行于世

### 盧昭隣

昭隣字升之范陽人調鄧王府典籤王愛重謂人曰  
此吾之相如也後遷新都尉嬰病去官居太白山墓  
閣得方士玄明膏餌之會交喪號慟因嘔丹輒出疾  
愈其家貧苦嘗嘗時時供衣藥乃去具茨山下買園  
數十畝疏潁水周舍後豫為墓偃卧其中自以當高  
宋之時尚吏已獨儒武后尚法已獨黃老后封松山

屢聘賢士已々廢著五悲文以自明手足孿緩不起  
行已十年每春歸秋至雲壑烟郊輒輿出戶庭愀然  
一望遂自傷作釋疾文有云覆壽雖廣嗟不容乎此  
生亭育雖繁恩已絕乎斯代與親屬訣自沈潁水有  
詩文二十卷及幽憂子三卷行於世

### 駱賓王

賓王義烏人七歲能賦詩武后時數上疏言事得罪  
貶臨海丞鞅鞅不得志弃官去文明中徐敬業起兵  
欲反正往投之署為府屬為敬業作檄傳天下慕存  
武后罪后見讀之矍然曰誰為之或以賓王對后曰



有如此才不用宰相過也及敗亡命不知所之後宋  
之間賤還道出錢塘遊靈隱寺夜月行吟長廊下曰  
鷲嶺巖巖龍宮隱寂寥未得下聯有老僧燃燈坐  
禪問曰少年不寐而吟諷甚苦何耶之間曰欲題此  
寺而思不屬僧咲曰何不道樓觀滄海日門對浙江  
潮之間終篇曰桂子月中落天香雲外飄捫蘿登塔  
遠剡木取泉遙雲薄霜初下水輕葉未周待入天台  
寺看余渡石橋僧一聯篇中警策也遲明訪之已不  
見老僧即駱賓王也傳聞桴海而去矣後中宗詔求  
其文得百餘篇及詩等十卷命郊雲卿次序之及百

道判集一卷今傳於世

### 杜審言

審言字必簡京兆人預之遠裔咸亨元年宋守節榜  
進士為隰城尉恃高才傲世見疾蘇味道為天官侍  
郎審言集判出謂人曰味道必死人驚問何故曰被  
見吾判當羞死耳又曰吾文章當得屈宋作衙官吾  
筆當得王羲之北面其矜誕類此坐事賤吉州司戶  
及武后召還將用之問曰鄉喜不審言舞路謙后令  
賦歡喜詩稱旨授著作即為修文館直學士卒初審  
言病宋之間武平一往省候曰甚為造化小兒相苦



尚何言然吾在久歷公等今且死但恨不見替人也  
少與李嶠崔融蘇味道為文章四友有集十卷今不  
存但傳詩四十餘篇而已

### 沈佺期

佺期字雲卿相州人上元二年鄭益榜進士工五言  
由協律考功郎受賕長流驩州後召拜起居郎兼脩  
文館直學士常侍宮中既侍宴帝詔學士等為回波  
舞佺期作弄辭悅帝詔賜牙絳歷中書舍人佺期嘗  
以詩贈張燕公公曰沈三兄詩清麗須讓居第一也  
詩名大振○自魏建安迄江左詩律屢變至沈約鮑

照庾信徐陵以音韻相婉附屬對精緻及佺期之間  
又加靡麗迴忌聲病約句準篇著定格律遂成近體  
如錦綉為文學者宗尚語曰蘇李居前沈宋比肩謂  
唐詩變體始自二公猶始自蘇武李陵也有集十卷  
今傳於世

### 宋之問

之問字延清汾州人上元二年進士偉貌辯給甫冠  
武后召與楊炯分直習藝館累轉尚方監丞后遊龍  
門詔從臣賦詩左史東方虬詩先成后賜錦袍之問  
俄頃獻后覽之嗟賞更棄袍以賜後求北門學士以



有齒疾不許遂作明河篇有明河可望不可親之句  
以見志諂事張易之坐貶瀟州後逃歸匿張仲之家  
聞仲之謀殺武三思乃告變擢鴻臚薄遷考功郎復  
媚太平公主以知舉賄賂狼籍下遷越州長史窮蹙  
剡溪山水置酒賦詩日遊宴賓客雜還睿宗立以無  
悛悟之心流欽州御史劾奏賜死人言劉希夷之報  
也徐堅嘗論其文如良金美玉無施不可有集行世

### 劉希夷

希夷字延芝潁川人上元二年鄭益榜進士時年二  
十五射策有文名苦篇諫特善閨帷之作詞情哀怨

多依古調體勢與時不合遂不為所重希夷美姿容  
好談笑善彈琵琶飲酒至數斗不醉落魄不拘常檢  
嘗作白頭吟一聯云今年花落顏色改明年花開復  
誰在既而歎曰此語讖也石崇謂白首同所歸復何  
以異乃除之又吟曰年年歲歲花相似歲歲年年人  
不同後歎曰死生有命豈由此虛言乎遂併存之舅  
宋之問苦愛後一聯知其未傳於人懇求之許而竟  
不與之問怒其誑已使奴以土囊壓殺於別舍時未  
及三十入悉憐之有集十卷及詩集四卷今傳○希  
夷天賦俊爽才情如此想其事業勳名何所不至孰



謂奇蹇之運遭逢惡人寸祿不霑長懷頓挫斯才高而見怠者也賈生悼長沙之屈祿衡痛江夏之來慘焉折首夫何殞命以陪侯之珠彈千仞之雀所較者輕所失者重王逆松摧良可惜也况於骨肉相殘者乎

### 陳子昂

子昂字伯玉梓州人開耀二年許且榜進士初年十八時未知書以富家子在夜尚無才博後入鄉校感悔即於州東南金華山觀讀書痛自脩飾精究墳典耽愛黃老易象光宅元年詣闕上書諫靈駕入京召

見武后奇其才遂拜麟臺正字令云地籍黃華文稱曄曄累遷拾遺聖曆初解官歸會父喪廬塚次縣令段簡貪殘聞其富造詐誣子昂協取賂二十萬緡猶薄之遂送獄子昂自筮卦驚曰天命不祐吾殆窮子果死獄中年四十三子昂貌柔雅為性褊躁輕財好施薦朋友之義唐興文章承徐庾餘風天下祖尚子昂始變雅正初為感遇詩三十章王適見而驚曰此子必為海內文宗猶是知名凡所著論世以為法詩調尤工掌勸后興明堂太學以調元死與遊英俊多康權衡柳公權評曰能極著述克備此與唐興以來



子昂而已有集十卷今傳○嗚呼古來材大或難為  
用象以有齒卒焚其身信哉子昂之謂歟

### 李百藥

百藥字重規定州人幼多病祖母以百藥名之七歲  
能文讓父德林爵會高祖招杜伏威百藥勸朝京師  
中道而悔怒飲以石灰酒因大利幾死既而宿病皆  
愈貞觀中拜中書舍人遷太子庶子掌侍帝同賦帝  
京篇手詔廢義曰卿何身老而才之壯齒宿而意之  
新乎百藥才行天下推服好辨薦後進翰藻沈鬱詩  
尤所長有集傳世

### 李嶠

嶠字巨山趙州人十五通五經二十擢進士累遷為  
監察御史武后時同鳳閣鸞臺平章事後因罪貶廬  
州別駕卒嶠富才思有所屬綴人輒傳諷明皇將幸  
蜀登花萼樓使樓前善水調者奏歌歌曰山川滿目  
淚霑衣富貴榮華能幾時不見只今汾水上惟有年  
年秋鴈飛帝慘愴移時顧侍者曰誰為此對曰故幸  
相李嶠之詞也帝曰真才子不待終曲而去嶠前與  
王勃楊炯接中與崔融蘇味道齊名晚諸人沒與文  
章宿老學者取法焉今集五十卷雜詠詩十二卷單



提詩一百二十首張方為註傳於世

### 張說

說字道濟洛陽人垂拱四年舉學綜古今科中第三等考策日封進授太子校書令日張說文思清新甄能優洽金門對策已居高科之首銀榜勉官沮申下命之秩後累遷鳳閣舍人睿宗時兵部侍郎平章事開元十八年終左丞相燕國公說敦无節重然諾為文精壯長於碑誌朝廷大述作多出其手詩法特妙晚謫岳陽詩益悽婉人謂得江山之助今有集三十卷行于世子均開元四年進士亦以詩鳴

### 王翰

翰字子羽并州人景雲元年盧逸下進士及第又舉直言極諫又舉超拔群類科少豪蕩恃才不羈喜縱酒櫛多名馬家畜妓樂翰發言立意自比王侯日聚英傑縱禽擊鼓為歡張嘉貞為本州長史厚遇之翰酒間自歌舞屬嘉貞神恣軒舉張說尤加禮異及輔政召為正字擢駕部員外郎說罷翰出為仙州別駕以窮樂改飲貶嶺表道卒翰工詩多壯麗之詞文士祖詠杜華等嘗與遊從華母崔氏云吾聞孟母三遷吾今欲卜居使汝與王翰為隣足矣其才名如此燕



公論其文如瑠杯玉簫雖爛然可珍而多玷缺云有  
集今傳○太史公恨古布衣之俠湮沒無聞以其義  
出存亡生死之間而不伐其德千金駟馬纔帝草芥  
信哉名不虛立也觀王翰之元其若人之儔乎

### 吳筠

筠字貞節華陰人通經義義文辭舉進士不中隱居  
南陽倚帝山為道士天寶中玄宗遣使詔至京師與  
語甚悅勅待詔翰林獻玄綱三篇帝問道對曰深於  
道者惟老子五千言其餘徒費紙禮耳復問神仙治  
鍊之術曰此野人之事積歲月求之非人主所宜問

意筠每陳設名教世務帝重之初筠愛會稽山水往  
來天台剡中與李白孔巢父相遇酬唱至是因薦於  
朝帝即遣使召之筠性高鯁其待詔翰林時特承恩  
顧高力士素奉佛掌短筠於上前筠故多著賦文深  
識釋氏頗為通人所譏云後知天下將亂苦求還崧  
山詔為立道觀大曆間李筌子謚為宗元先坐善為  
詩有集十卷權德輿序之

### 張子容

子容襄陽人開元元年常無名榜進士仕為樂城令  
初與孟浩然同隱鹿門山為死生交詩篇唱答頗多



後值亂離流寓江表嘗送內兄李錄事歸故里云十年多難與君同幾處移家逐轉蓬  
自首相逢征戰後青春已過亂離中  
行人杳々看西日啼馬蕭々向壯風  
漢水楚雲千萬里天涯此別恨無窮  
後竟弃官歸舊業有詩集興趣高遠畧去凡近  
當時哲匠咸稱道焉

### 李日邕

景開元二年王位下狀元及第天寶間仕為禮部侍郎  
即知貢舉獎拔寒素甚多工詩有戚夫人楚舞歌一篇  
播傳人口真佳作也

### 孫逖

逖博州人幼而有文屬思警敏援筆成篇開元二年  
舉手筆俊拔哲人奇士隱論屠釣及文藻宏麗等科  
第一人及第玄宗引見擢左拾遺集賢殿修撰改考  
功負外郎遷中書舍人與顏真卿李華蕭穎士皆同  
時稱海內名士仕終刑部侍郎善詩古調今格悉其所  
長集二十卷今傳

### 盧鴻

鴻字浩然隱居崧山博學善八分書工詩兼畫山水  
樹石開元初玄宗僉禮徵再三不至詔曰鴻有泰山



之道中庸之德鈞深誼微確乎自高詔書屢下每輒  
 詩詒使朕虛心引領于今有年雖得素履幽人之介  
 而失考父滋恭之誼禮有大倫君臣之義不可廢也  
 有司其賈束帛之具重宣茲旨想其翻然易節副朕  
 意焉鴻遂至東都謁見不拜宰相問狀荅曰禮者忠  
 信所薄臣敢以忠信見帝召升內殿置酒拜諫議太  
 夫固辭復下詔許還山將行賜隱居服官管草堂鴻  
 到山中廣精舍從學者五百人及卒詔賜萬錢營葬  
 後皮日休為七愛詩謂傲大君者必有真隱廬徵君  
 是也工詩今傳甚多

### 王冷然

冷然山東人開元五年裴輝卿下進士授將仕郎守  
 太子校書郎工文賦詩无質豪爽當言無所回忌乃  
 卓犖奇才濟世之器惜其不大顯而終有集今傳

### 劉脊虛

脊虛崧山人姿容秀拔九歲屬文上書召見拜童子  
 郎開元十十年徐徵榜進士調洛陽尉遷夏縣令性  
 高古脫畧勢利嘯傲風塵後欲卜隱廬阜不果交遊  
 多山僧道侶為詩情幽興遠思雅詞音忽有所得便  
 驚眾聽當時東南高唱者數十人聲律婉態無出其



右唯秀骨不逮諸公求明已還端可傑立江表善爲  
方外之言夫何不末天碎國寶有志不就惜哉集今  
傳世

### 王灣

灣開元十十年常無名榜進士與學士綦母潛契切  
詞翰早著爲天下所稱往來吳楚間多有著述如江  
南意下聯云海日生殘夜江春入舊年詩人以來罕  
有此作張璠公手題於政事堂每示能文令爲楷式  
曾奉使登終南山有賦志趣高遠識者不能弃焉

### 崔顥

顥汴州人開元十十年源少良下及進士第天寶中  
爲尚書司勳員外郎少年爲詩意浮艷多陷輕薄晚  
節忽變常體風骨凜然一窺塞垣狀極戎旅奇遠往  
徃並驅江鮑後遊武昌登黃鶴樓感慨賦詩及李白  
來曰眼前有景道不得崔顥題詩在上頭無作而去  
爲哲匠歛手云然行履稍劣好蒲博嗜酒娶妻擇美  
者稍不愜即弃之凡易三四初李邕聞其名虛舍邀  
之顥至獻詩首章云十五嫁王昌邕叱曰小兒無禮  
不與接而入顥苦吟詠當病起清虛友人戲之曰非  
子病如此乃苦吟詩瘦耳遂爲口實天寶十三年卒



有詩一卷今行

### 祖詠

詠洛陽人開元十二年杜綰榜進士有文名商璠評其詩剪刻省靜用思尤苦无雖不高調頗凌俗足稱爲才子也少與王維爲吟侶維在濟州寓官舍贈祖三詩有云結交三十載不得一日展貧病子既深契闊余不淺盖亦流落不偶極可傷也後移家歸汝墳間別業以漁樵自終有詩一卷傳於世

### 儲光羲

光羲兗州人開元十四年嚴迪榜進士有詔中書試

文章堂爲監察御史值安祿山陷長安輒受僞署賊平後自歸貶死嶺南工詩格高調逸趣遠情深削畫常言挾風雅之道養浩然之炁覽者猶聆韶濩音先洗桑濮耳庶幾乎賞音也有集七十卷正論十五卷九經分義疏二十卷並傳

### 唐才子傳卷第一



唐才子傳卷第二目錄

包融

崔國輔

盧象

韋述

綦毋潛

王昌齡

辛霽

常建

賀蘭進明

崔署

陶翰

王維

裴迪

崔興宗

薛據

劉長卿

李穆

李季蘭

劉媛

鮑君微

崔仲容

元淳

薛縕

崔公達

張窈窕

程長文

梁瑀

廉氏

姚月華

裴羽仙

劉瑤

常浩

葛鵬兒

耻々

譚意哥

張夫人

張文姬

趙氏

耻々

崔鷺々

閻防

李傾

張誼

孟浩然

丘爲

李白

杜甫

鄭夏

高適

沉千運

孟雲卿







王無瑕清塵遠播芝蘭繼芳重難敗於父道騷雅接響庶不慊於祖風四難之間揮塵之際亦可以為美談矣

### 崔國輔

國輔山陰人開元十四年嚴迪榜進士與儲光羲綦毋潛同時舉縣令累遷集賢直學士禮部郎中天寶間坐是王鉞近親貶竟陵司馬有文及詩婉變清楚深宜諷詠樂府短章古人有不能過也初至竟陵與處士陸鴻漸遊三歲交情至厚譔咲永日又相與較定茶水之品臨別謂羽曰予有襄陽太守李愷所遺

白驢烏犍牛各一頭及廬所遺文槐書函一枚此物皆已之所惜者宜野人蓄故特以相贈雅意高情一時所尚有醇醪之歌詩并集傳焉

### 盧象

象字緯鄉汶水人鴻之姪也雙家來居江東最久仕為校書郎左拾遺膳部員外郎授安祿山偽官貶求州司戶參軍後為主客員外郎有詩名譽充秘閣雅而不素有大體得國土之風集二十卷今傳同仕有韋述為桑泉尉時詔求逸書命述等編校於朝元殿後為翰林學士有詩名今亦傳焉



綦毋潛

潛字孝通荆南人開元十四年嚴迪榜進士及第授  
宜壽尉遷右拾遺入集賢院待制後授校書終著作  
郎與李端同時詩調屹崿峭崿足佳句善寫方外之  
情歷代未有荆南分野數百年來獨秀斯人後見兵  
亂官况日惡挂冠歸隱江東別業王維有詩送之曰  
明時久不達弃置與君同天命無怨色人生有素風  
一時文士咸賦詩祖餞其榮有集一卷行世

王昌齡

昌齡字少伯太原人開元十五年李嶷榜進士授記

水尉又中宏辭遷校書郎後以不護細行貶龍標尉  
以刀火之際歸鄉里為刺史閭丘曉所忌而殺後張  
鎬按軍河南曉愆期將戮之詩以親老乞恕鎬曰王  
昌齡之親欲與誰養乎曉大慚沮昌齡工詩續密而  
思清時稱詩家夫子王江寧蓋掌為江寧令與文士  
王之渙手漸交友至深皆出模範其名重如此有詩  
集五卷又述作詩格律境思體例共十四篇為詩格  
一卷又詩中密旨一卷及古樂府解題一卷今並傳  
○自元嘉以還四年之內曹劉陸謝風骨頗盡逮儲  
光羲王昌齡頗從厥跡而賢无同而體別也王綉聲



峻奇句俊格驚耳駭目奈何晚途不矜小節謗議騰沸兩竄遐荒使知音者喟然長歎至歸全之道不亦痛哉

### 常建

建長安人開元十五年與王昌齡同榜登科大曆中授盱眙尉仕頗不如意遂放浪琴酒往來太白紫閣諸峯有肥遯之志嘗採藥仙谷中遇女子遍體毛綠自言是秦時宮人亡入山來食松華遂不饑寒因授建微旨所養非常後寓鄂渚招王昌齡張債同隱獲大名當時集一卷今傳○古稱高才而無貴仕誠哉

是言曩劉楨死於文學鮑照卒於參軍今建亦淪於一尉悲夫建屬思既精詞亦警絕似初發通莊却得野徑百里之外方歸大道旨遠興僻能論意表可謂一唱而三歎矣

### 賀蘭進明

進明開元十六年屢咸榜進士及第仕為御史大夫肅宗時出為河南節度使時祿山群黨未平掌帥師屯臨淮倫賊竟亦無功進明好古博雅經籍滿腹其所著述一百餘篇頗究天人之際又有古詩樂府等數十篇大體符於阮公皆今所傳者云



崔署

署宋州人少孤貧不應薦辟志况踈爽擇交於方外  
苦讀書高栖少室山中與薛據友善詩言詞款要  
情與悲源送別登樓俱堪淚下集傳于今也

陶翰

翰潤州人開元十八年崔明夕下進士及第次年  
博學宏辭與鄭昉同時官至禮部員外郎為詩詞筆  
雙美既多興象復倫風骨三百年以前方可論其裁  
製大為當時所稱今有集相傳

王維

維字摩詰太原人九歲知屬辭工草隸閑音律岐王  
重之維將應舉岐王謂日子詩清越者可錄數篇  
琵琶新聲能度一曲同詣九公主第維其如言是日諸  
伶擁維獨奏主問何名曰鬱輪袍因出詩卷主曰皆  
我習諷謂是古作乃子之佳製乎延於上座曰京兆  
得此生為解頭榮哉力薦之開元十九年狀元及第  
擢左拾遺遷給事中賊陷兩京駕出幸維扈從不及  
為所擒服藥稱瘖病祿山愛其才通至洛陽供舊職  
拘於普施寺賊宴凝碧池悉召梨園諸工合樂維痛  
悼賦詩曰萬戶傷心生野烟百官何日再朝天秋槐



花落空宮裏，凝碧池頭羨管絃。時聞行在所，賊平後授偽官者，皆定罪，獨維得免。仕至尚書右丞。維詩入妙品上，多畫思。亦然至山水，平遠雲勢石色，皆天機所到。非學而能自為詩云：當代謬詞客，前身應畫師。後人評維詩中有畫，畫中有詩。信哉。客有以按樂圖示維者，曰：此霓裳第三疊最初指也。對曲果然。篤志奉佛，蔬食素衣，喪妻不再娶。孤居三十年，別墅在藍田縣南，輞川亭，館相望。嘗自寫其景物，奇勝。且與文士丘丹、裴迪、崔興宗遊，覽賦詩琴樽自樂。後表宅請以為寺，臨終作書，辭親友，停筆而化。代宗訪維文章。

余續集賦詩等十卷上之今傳于世

### 薛據

據荊南人，開元十九年王維榜進士。天寶元年又中風雅古調科，第十一人。於吏部參選，據自恃才名，請受萬年錄事流外官，訐宰執以為赤縣。是其等清要，據無媒改涉縣令。後仕歷司議郎，終水部郎中。據為人骨鯁，有氣魄，文章亦然，嘗自傷不得早達，造句往往追凌鮑謝。初好棲遁，居高鍊藥，晚歲置別業終南山下，老焉。有集，今傳。

### 劉長卿



長卿字文房河間人少居嵩山讀書後移家來鄱陽  
最久開元二十一年徐徵榜及第至德中歷監察御  
史以檢校祠部員外郎出為轉運使判官知淮西岳  
鄂轉運留後觀察使吳仲孺誣奏非罪繫姑蘇獄又  
之貶潘州南巴尉會有為辯之者量移睦州司馬終  
隨州刺史長卿清才冠世頗凌浮俗性剛多忤權門  
故兩逢遷斥人悉寃之詩調雅暢甚能煉飾其自賦  
傷而不怨足以發揮風雅權德輿稱為五言長城長  
卿嘗謂今人稱前有沈宋王杜後有餞郎劉李李嘉  
祐郎士元何得與余並驅每題詩不言姓名但書長卿

以天下無不知其名者云灞陸碧澗有別業今集詩  
賦文等傳世淮南李穆有清才公之塔也

### 李季蘭

季蘭名冶以字行峽中人女道士也美容神情蕭  
散專心翰墨善彈琴尤工格律當時才子頗誇纖麗  
殊少荒艷之態始年六歲時作薔薇詩云經時不架  
却心緒亂縱橫其父見曰此女聰黠非常恐為失行  
婦人後以交遊文士微泄風聲皆出乎輕薄之口夫  
士有百行女唯四德季蘭則不然形氣既雄詩意亦  
蕩自鮑照以下罕有其倫時往來剡中與山人陸羽



苦當擬詩序  
作善

上人皎然意甚相得皎然嘗有詩云天女來相試將  
花欲染衣禪心竟不起還捧舊華歸其詭浪至此又  
嘗會諸賢於烏程開元寺知河間劉長卿有陰重之  
疾誚曰山氣日夕佳劉應聲曰衆鳥欣有託舉坐大  
笑論者兩美之天寶間玄宗聞其詩才詔赴闕留宮  
中月餘優賜甚厚遣歸故山評者謂上比班姬則不  
足下比韓英則有餘不以遲暮亦一俊媪有集今傳  
於世論曰詩云關雎樂得淑女以配君子憂在進  
賢不淫其色哀窈窕思賢才而無傷苦之心焉故古  
詩之道各存六義然終歸于正不離乎雅是有昔賢

婦人散情文墨班之簡牘槩而論之後來班姬傷秋  
扇以暫恩謝娥詠絮雪而同素大家七試執者修省  
蔡琰胡茄聞而心折率以明白之操微義之誠欲見  
於悠遠寓文以宣情含毫而見志豈泛濫之故使人  
擊節露洒彈指追念良有謂焉噫筆墨固非女子之  
事亦在用之如何耳苟天之可造禮不必俗則詞為  
自獻之具詩有妬情之作衣服酒食無閑淨之容鈿  
華膏澤多鮮飾之態故不相宜矣是播惡於衆何關  
雅之義哉歷觀唐以雅道獎士類而閨閣英秀亦能  
熏染錦心繡口蕙情蘭性足可尚矣中間如李季蘭



魚玄機皆躍出方外修清淨之教陶寫密懷留蓮光  
景道遙閑暇之功無非雲水之念與名儒比隆珠往  
瓊復然浮艷委託之心終不能盡白璧微瑕惟在此  
耳薛濤流落歌舞以靈慧獲名當時此亦難矣三者  
既不可畧如劉媛劉雲鮑君微崔仲容道士元淳薛  
緝崔公達張窈窕程長文梁瓊廉氏姚月華裴羽仙  
劉瑤常浩葛鷓兒崔鷲々譚意哥戶部侍郎吉中孚  
妻張夫人鮑參軍妻文姬杜羔妻趙氏張建封妾盼  
々南楚材妻薛媛等皆能華藻才色雙美者也或望  
幸離宮傷寵後掖或以從軍萬里斷絕音耗或抵連

年迢遙風水或為若子妻或為商人婦花雨春夜月  
露秋夫玄鳥將謝賓鴻來屈搗錦石之流黃織迴文  
於緗綺魂夢飛遠關山到難當此時也濡毫命素寫  
惡書懷一語一聯俱堪墮淚至若間以半羅雜以纖  
纒導淫奔之約叙久曠之情不假綠琴但飛紅紙中  
間不能免焉尺有短而寸有長故未欲推理之云爾

閻防

防河中人開元二十二年李琚榜及第顏真卿甚敬  
愛之欲薦於朝不屈為人好古博雅詩語真素魂清  
魄爽放曠山水高情獨詣於終南山豐德寺結茆茨



讀書百丈溪是其隱處題詩云浪蹟弃人世還山自  
繇獨始傍巢由蹤吾其獲心曲又云養閑度人事達  
命知止足不學魯國儒俟時勞伐輻後信命不務進  
取以此自終有詩集行世

### 李頌

頌東川人開元二十三年賈李隣榜進士及第調新  
鄉縣尉性疎簡厭薄世務慕神仙服餌丹砂期輕舉  
之道結好塵喧之外一時名輩莫不重之其詩發調  
既清修辭亦秀雜歌咸善玄理最長多為放浪之語  
足可震蕩心神惜其偉材只到黃綬故其論家往往  
高於衆作有集傳

高於衆作有集傳

### 張誼

誼永嘉人初隱少室下閉門修業志甚勤苦不及聲  
利後應舉官到刑部員外郎明易象善草隸兼畫山  
水詩格高古與李頌友善事王維為兄皆為詩酒丹  
青之契維贈詩云屏風誤點成孫郎團扇草書驚內  
史李頌贈曰小主破體閑支策落月梨花空照壁詩  
堪記室妬風流畫與將軍作勅敵天寶中謝官歸故  
山偃仰不復來人間矣有詩傳世

### 孟浩然



浩然襄陽人少好節義詩工五言隱鹿門山即漢龐  
公棲隱處也四十遊京師諸名士間掌集秘書省聯句  
浩然曰微雲淡河漢疎雨滴梧桐衆飲服張九齡王  
維極稱道之維待詔金鑾下且私邀入商較風雅俄  
報玄宗臨幸浩然錯愕伏匿床下維不敢隱因奏聞  
帝喜曰朕素聞其人而未見也詔出再拜帝問曰鄉  
將詩來耶對曰偶不齋即命吟近作誦至不才明主  
弃多病故人疎之句帝慨然曰鄉不來在朕何嘗棄  
卿奈何誣我因命放還南山後張九齡署爲從事開  
元末王昌齡遊襄陽時新病起相見甚歡浪情宴譔

食鮮勤疾而終○古稱衿衡不遇趙壹無祿觀浩然  
聲折謙退才名日高竟淪明代終身白衣良可悲夫  
其詩文采半草經緯綿密半遵雅調全削凡近所著  
三卷今傳王維畫浩然像於郢州爲浩然亭咸通中  
鄭緘謂賢者各不可斥更名曰孟亭今存焉

### 丘爲

爲嘉興人初累舉不第歸山讀書數年天寶初劉單  
榜進士王維甚稱許之堂與唱和初事繼母孝有靈  
芝生堂下累官太子右庶子時年八十餘母猶無恙  
給俸祿之半觀察使韓滉以爲致仕官給祿所以惠



養孝臣不可在喪為異唯罷春秋羊酒初還縣令謁之為侯門聲折令坐方拜里昏立庭下既出乃敢坐經縣署降馬而過舉動有禮卒年九十六有集行世

### 李白

白字太白山東人母夢長庚星而誕因以命之十歲通五經自夢筆頭生花後天才瞻逸喜縱橫擊劍為任俠輕財好施更客任城與孔巢父韓準裴政張叔明陶沔居徂徠山中日沉飲號竹溪六逸天寶初自蜀至長安道未振以所業投賀知章讀至蜀道難歎

曰子謫仙人也乃解金龜換酒終日相樂遂薦於玄宗召見金鑾殿論時事因奏頌一篇帝喜賜食親為調羹詔供奉翰林嘗大醉上前草詔使高力士脫鞵力士耻之摘其清平調中飛燕事以激怒貴妃帝每欲與官妃輒沮之白益傲放與賀知章李適之汝陽王璣崔宗之蘓晉張旭焦遂為飲酒八仙人懇求還山賜黃金詔放歸白浮遊四方欲登花山乘醉跨驢經縣治幸不知怒引至庭下曰汝何人敢無禮白供狀不書姓名曰曾令龍巾拭吐御手調羹貴妃捧硯力士脫鞵天子問前尚容走馬花陰縣裏不得騎驢



宰驚愧拜謝曰不知翰林至此白長笑而去掌乘舟  
與崔宗之自采石至金陵著官錦袍坐傍若無人祿  
山反明皇在蜀永王璘節度東南白時卧廬山辟為  
僚佐璘起兵反白逃還彭澤璘敗累繫浔陽獄初白  
遊并州見郭子儀奇之曾救其死罪至是郭子儀請  
官以贖詔長流夜郎白晚節好黃老度牛渚磯乘酒  
捉月沈水中初悅謝家青山今墓在焉有文集二十一  
卷行世 或云白涼武昭王嵩九世孫也

### 杜甫

甫字子美京兆人審言生閑々生甫少貧不自振容

兵越齊趙間李邕奇其材先往見之舉進士不中第  
困長安天寶三載玄宗朝獻太清宮饗廟及郊甫奏  
賦三篇帝奇之使待詔集賢院命宰相試文章擢河  
西尉不拜改右衛率府胥曹參軍數上賦頌高自稱  
道且言先臣恕預以來承儒守官十一世迨審言以  
文章顯臣賴緒業自七歲屬辭且四十年然衣不蓋  
體常寄食於人竊恐轉死溝壑伏惟天子哀憐之若  
令執先臣故事拔泥塗久辱則臣之述作雖不足鼓  
吹六經先鳴數子至沈鬱頓挫隨時敏給揚雄枚臯  
可企及也有臣如此陛下其忍棄之會祿山亂天子



入蜀甫避走三川肅宗立自鄜州羸服欲奔行在為  
賊所得至德二年亡走鳳翔上謁拜左拾遺與房瑄  
為布衣交瑄時敗兵又以琴客董廷蘭之故罷相甫  
上疏言罪細不宜免大臣帝怒詔三司雜問宰相張  
鎬曰甫若抵罪絕言者路帝解不復問時所在寇奪  
甫家寓鄜彌年艱窶孺弱至餓死因許甫自往省視  
從還京師出為花州司功參軍關輔創輒棄官去客  
秦州負薪拾橡栗自給流落劍南營草堂成都西郭  
浣花溪召補京兆功曹參軍不至會嚴武節度劍南  
西川往依焉武再帥劍南表為參謀檢校工部員外

郎武以世舊待甫甚善親詣其家甫見之或時不巾  
而性褊躁傲誕常醉登武床瞪視曰嚴挺之乃有此  
兒武中銜之一日欲殺甫集吏於門武將出冠鈎於  
簾者三左右走報其母力救得止崔旰等亂甫往來  
梓夔間大曆中出瞿塘泝沅湘以登衡山因客來陽  
遊嶽祠大水暴至涉旬不得食縣令具舟迎之乃得  
還為設牛炙白酒大醉一昔卒年五十九甫放曠不  
自檢好論天下大事高而不切也與李白齊名時號  
李杜數嘗寇亂挺節無所汙為歌詩傷時撓弱情不  
忘君人皆憐之墳在岳陽有集六十卷及潤州刺史



樊冕纂小集今傳。能言者未必能行，能行者未必能言。觀李杜二公，踣躓版蕩之際，語々王霸褒貶得失，忠孝之心，驚動千古。騷雅之妙，雙振當時。兼衆善於無今，集大成於往作。歷世之下，想見風塵，惜乎長轡未騁，奇才並屈，竹帛少色，徒列空言。嗚呼哀哉！昔謂杜之典重，李之飄逸，神聖之際，二公造焉。觀於海者，難為水遊；李杜之門者，難為詩斯言信哉。

鄭虔

虔，鄭州人，高士也。蘇詩公為宰相，申以忘年之契，薦為著作，即掌以當世事，著書八十餘篇，有告虔私撰

國史者，虔蒼惶焚之，坐謫十年。玄宗愛其才，開元二十五年為更置廣文館，虔為博士。廣文博士自虔始。杜甫為交，有贈詩曰：才名四十年，坐客寒無種。惟有蘇司業，時々與酒錢。其窮飢餓軻淡如也。好琴酒，篇詠善圖山水，能書，苦無紙於慈恩寺貯柿葉數屋，遂日就書殆遍，嘗自寫其詩并畫表獻之。玄宗大署其尾曰：鄭虔三絕，與李杜為密友，多縑，鄭廣文、祿山反，偽授水部員外郎，託以疾不奪，賊平，張通、王維並囚繫，三人皆善畫，崔圓使繪齋壁，因為析解，得貶台州司戶，率有集行世。



高適

適字達夫一字仲武滄州人少惟拓落不拘小節耻預常科隱跡博徒才名便遠後舉有道授封丘尉未幾哥舒翰表掌書記後擢諫議大夫負氣敢言權近側目李輔國忌其才蜀亂出為蜀彭二州刺史遷西川節度使還為左散騎常侍未幾初卒適尚氣節語王霸衮衮不厭遭時多難以功名自許年五十始學為詩即工以氣質自高多胸臆間語母一篇已好事者輒傳播吟玩嘗過汴州與李白杜甫會酒酣登吹臺慷慨悲歌臨風懷古人莫測也中間唱和頗多今

有詩文等二十卷及所選至德迄大曆述作者二十人詩為中興間氣集二卷並傳

沈千運

千運吳興人工舊體詩氣格高古當時士流皆敬慕之號為沈四山人天寶中數應舉不第時生齒已邁邀遊襄鄧間干謁名公來濮上感懷賦詩曰聖朝優賢良草澤無遺族人生各有命在余胡不淑一生但區々五十無寸祿衰落當捐棄貧賤招謗讟其時多艱自知屯蹇遂浩然有歸歎之志賦詩曰棲隱無別事所願離風塵不來城邑遊禮樂拘束人又曰如何



巢與由天子不得臣遂釋志還山中別業掌曰衡門  
之下可以棲遲有薄田園兒稼女織偃仰今古自足  
此生誰能作小吏走風塵下乎高適賦還山吟贈行  
曰還山吟天高日暮寒山深送君還山識君心人生  
老大須恣意看君解作一生事山間偃仰無不至石  
泉淙々若風雨桂花松子常滿地賣藥囊中應有錢  
還山服藥又長年白雲勸盡杯中物明月相隨何處  
眠々時憶同醒時意夢魂可以相周旋肅宗議備禮  
徵會卒而罷有集傳世

### 孟雲卿

雲卿關西人天寶間不第氣頗難平志亦高尚懷嘉  
遜之節與薛據相交善掌流寓荊州杜工部多有與  
雲卿贈答之作甚愛重之工詩其體祖述沉千運漁  
獵陳拾遺詞氣傷怨雖然模効纔得外堂猶未入室  
當時古調無出其右一時之英也如虎豹不相食哀  
哉人食人又朝亦常苦饑暮亦掌苦饑飄々萬里餘  
貧賤多是非少年莫遠遊遠遊多不歸皆為當代推  
服韋應物過廣陵遇孟九贈詩云高文激頽波四海  
靡不傳西施且一笑衆女安得妍其才名於此可見  
矣仕終校書郎集今傳○雲卿京通濟之才淪吞噬



之俗栖々南北苦無所遇何生之不振也身處江湖  
 心存魏闕猶杞國之人憂天墜相率而進者匹夫之  
 志亦可念矣

唐才子傳卷第二

唐才子傳卷第三目錄第

岑參

王之奐

賀知章

包何

包佶

張麗

李嘉祐

賈至

鮑防

謝良

殷遙

張繼

元結

卽士元

靈一

維審  
文益

護因  
可止

清江

法照

廣宜

無本

修睦

無悶

太易

景雲

法振

栖白

隱叟

愚默

鄉雲

栖一

淡交

良又

若虛

雲表

曇域

子蘭

僧鷲

懷素

惠標

可用

懷浦

慕齒

善生

亞棲

尚顏

栖蟾

理瑩

歸仁

玄宝

惠侃

法宣

皇甫冉

皇甫曾

獨孤及

劉方平

秦系

張衆甫

趙微明  
元季川

于逖

蔣渙



|     |     |    |     |
|-----|-----|----|-----|
| 嚴維  | 于良史 | 靈徹 | 陸羽  |
| 顧况  | 張南史 | 戎昱 | 包子虛 |
| 古之奇 | 蘇渙  | 宋灣 | 張志和 |

唐才子傳卷第三

岑參

西域 辛 文房 撰

參南陽人。文本之後。天寶三年。趙岳榜第二人。及第。累官左補闕。起居郎。出為嘉州刺史。杜鴻漸表置安西幕府。拜職方郎中兼侍御史。辭罷。別業在杜陵山中。後終于蜀。參累佐戎幕。往來鞍馬烽塵間。十餘載。極征行離別之情。城障塞堡。無不經行。博覽史籍。尤工綴文。屬詞清尚。用心良苦。詩調尤高。唐興罕見此作。放情山水。故常懷逸念。奇造幽致。所得往々超拔。



孤秀度越常情與高適風骨頗同讀之令人慷慨懷  
感每篇絕筆人輒傳味至德中裴休杜甫等常薦其  
識度清遠議論雅正佳名早立時輩所仰可以備獻  
替之官未及大用而謝世豈不傷哉有集十卷行于  
世杜確為之序云

### 王之奩

之奩荆門人少有俠氣所從游皆五陵少年擊劍悲  
歌從禽縱酒中折節工文十年名譽日振耻困場屋  
遂交謁名公為詩情致雅暢得齊梁之風每有作樂  
王輒取以被聲律與王昌齡高適暢當志形尔汝掌

共詣旗亭有梨園名部繼至昌齡等曰我輩擅詩名  
未定甲乙可觀諸伶謳詩以多者為優一伶唱昌齡  
二絕句一唱適一絕句之奩曰樂人所唱皆下俚之  
詞須臾一佳妓唱曰黃沙遠上白雲間一片孤城萬  
仞山差笛何須怨楊柳春風不度玉門關復唱二絕  
皆之奩詞三子大笑曰田舍奴吾豈妄哉諸伶竟不  
諭其故拜曰肉眼不識神仙三子從之酣醉終日其  
狂放如此云有詩傳于今

### 賀知章

知章字季真會稽人少以文詞知名性曠夷善談論



笑謔證聖初擢進士超拔群類科陸象先在中書引  
為太常博士象先與知章最親善常曰季真清談風  
韻吾一日不見則鄙吝生矣當時賢達皆傾慕之為  
太子賓客開元十三年遷禮部侍郎兼集賢院學士  
晚年尤加縱誕無復禮度自號四明狂客又稱秘書  
外監遨遊里巷又善草隸每醉輒屬辭筆不停綴咸  
有可觀每紙不過數十字好事者共傳寶之天寶三  
年因病夢遊帝居及寤表請為道士求還鄉里即舍  
住宅為千秋觀上許之詔賜鏡湖剡溪一曲以給漁  
樵帝賦詩及太子百官祖餞壽八十六集今傳

### 包何

何字幼嗣潤州延陵人包融之子也與弟佶俱以詩  
鳴時稱二包天寶七年揚譽榜及第曾師事孟浩然  
授格法與李嘉祐相友善大曆中仕終起居舍人詩  
傳者可數蓋流離世故卒多素辭大播芳名亦當時  
望族也

### 包佶

佶字幼正天寶六年楊護榜進士累遷秘書監劉晏  
治財奏為汴東兩稅使及晏罷以佶為諸道鹽鐵等  
使未幾遷刑部侍郎太常少卿拜諫議大夫御史中



兼居官謹確所在有聲信天才瞻逸氣宇清深心醉  
古經神和大雅詩家老斷也與劉長卿竇叔向諸公  
皆莫逆之愛晚歲沾風痺之疾辭龍樂高不及榮利  
卒封冊陽郡公有詩集行於世

### 張瑰

瑰穎上人初赴舉無所遇適遭喪亂奉老母避地隱  
居嵩山供養至謹與孟雲卿為中表俱工古調詩雲  
鄉有贈云善道居貧賤素服蒙塵埃行々無定心坎  
壙難歸來性高簡善草書志在輕舉詠神仙云五穀  
非長年四氣乃靈藥列子何必待吾心滿家廓時與

杜甫往還嘗寄張十二山人詩云靜者心多妙先生  
藝絕倫草書何太古詩興不無神曹植休前輩張之  
更後身數篇吟可老一字買堪資觀工部之作可知  
其人矣

### 李嘉祐

嘉祐字從一趙州人天寶七年楊譽榜進士為秘書  
正字以罪謫南荒未幾何有直詔量移為鄱陽宰又  
為江陰令後遷台表二州刺史善為詩綺麗婉靡與  
錢卽別為一體往往涉於齊梁時風人擬為吳均何  
遜之敵自振藻天朝大收芳譽中興風流也有集今



傳

賈至

至字幼幾洛陽人曾之子也曾開元間與蘇晉同掌制誥至天寶十年明經擢第累官起居舍人知制誥從幸西川當撰傳位肅宗無文既進藁玄宗曰先天誥命乃父所為今茲大無尔又為之兩朝盛典出鄉家父子可謂繼美矣大曆初遷京兆尹以散騎常侍卒初嘗以事謫守巴陵與李白相遇日酣不置酒追憶京華舊遊多見醉唱白贈詩有云聖主恩深漢文帝憐君不遣到長沙至特工詩俊逸之氣不減鮑昭庾

信調亦清暢且多素辭蓋厭於漂流淪落者也有集三十餘卷今傳

鮑防

防字子慎天寶十一年楊儉榜進士襄陽人也善辭章篤志於學累官至太原尹河東節度使入樂其治不減龔黃詔圖形別殿又歷福建江西觀察使丁亂從幸奉天除禮部侍郎封東海公又遷御史大夫貞元元年策賢良方正得穆質柳公綽等皆位至台鼎世表其知人時比歲旱質對漢故事免三公京兆羊權近獨孤恠欲下按治防曰使上聞所未聞不亦善



乎置質高第帝見策嘉之授工部尚書卒防工於  
詩興思優足風調嚴整凡有感發以譏切世弊正國  
音之宗流也與謝良為詩友時亦稱鮑謝云有集今  
傳

### 殷造

遙丹陽人天寶間常仕為忠王府倉曹參軍與王維  
結交同慕禪寂志趣高踈多雲岫之想而苦家貧死  
不能葬一女纔十歲日哀號於親愛憐之者贈埋  
骨石樓山中工詩詞彩不群而多警句句杜甫嘗稱許  
之有詩傳于今

### 張繼

繼字懿孫襄州人天寶十二年禮部侍郎楊浚下及  
第與皇甫冉有鬢年之故契逾崑玉早振詞名初來  
長安頗矜氣節有感懷詩云調與時人背心將靜者  
論終年帝城裏不識五侯門掌佐鎮戎軍幕府又為  
鹽鐵判官大曆間入內侍仕終檢校祠部郎中繼博  
覽有識好談論知治體亦掌領郡輒有政聲詩情爽  
激多金玉音蓋其累代詞伯積襲弓裘其於為文不  
雕自飾丰姿清迥有道者風集一卷今傳

### 元結



結字次山武昌人魯山令元紫芝族弟也少不羈弱  
冠始折節讀書天寶十三年進士禮部侍郎楊浚見  
其文曰一第恩子耳遂擢高品後舉制科會天下亂  
沈浮人間蘇源明薦於肅宗授右金吾兵曹累遷御  
史參山南來瑱府除容管經畧使始隱於商山中稱  
元子逃難入琦玗洞稱琦玗子或稱浪士漁者或稱  
聲與酒徒漫叟及爲官呼漫郎皆以命所著性梗僻  
深憎薄俗有憂道閔世之心中興頌一文燦爛金石  
清奪湘流作詩著辭尚聳牙天下皆知敬仰復嗜酒  
有句云有時逢惡客自註非酒徒即惡客也有文編

十卷及所集當時人詩爲篋中集一卷並傳

### 卽士元

士元字君胃中山人也天寶十五載盧庚榜進士寶  
應初選京畿縣官詔試政事中書補渭南尉歷左拾  
遺出爲郢州刺史與貞外卽錢起齊名時朝廷自蒸  
相以下出牧奉使無兩君詩文祖談人以爲愧其珍  
重如此二公體調大抵欲同就中卽君稍更閑雅逼  
近康樂珠聯玉映不覺成編掩映時流名不虛矣有  
別業在羊日吳村王季友錢起等皆見題詠每誇勝  
絕詩集今傳于世



道入靈一

一公剡中人童子出家鉞鉢之外餘無有天性超類  
追蹤謝客隱麻源第二谷中結茅讀書後白業精進  
居若耶溪雲門寺從學者四方而至矣尤工詩氣質  
淳和格律清暢兩浙名山暨衡廬諸甲刹悉所經行  
與皇甫昆季嚴少府朱山人徹上人等為詩友酬贈  
甚多刻意聲調苦心不倦騁譽叢林後順寂於岑山  
集今傳世

論曰自齊梁以來方外工文者如支道道惠休寶  
月之傳馳驟文苑沉淫藻思奇章偉什綺錯星陳不  
為寡矣厥後喪亂兵革相尋緇素亦已狼藉罕有後  
入其流者至唐累朝雅道大振古風再作卒皆崇衷  
像教駐念津梁龍象相望金碧交映雖寂寥之山河  
實威儀之淵藪寵光優渥無逾此時故有顛顛文場  
之人憔悴江海之客徃々裂冠裳撥繒繳杳然高邁  
雲集蕭齋一食自甘方袍便足靈臺澄皎無事相干  
三餘有簡牘之期六時分吟調之際青峯數門綠水  
周舍長節步屣幽徑尋真景變序遷蕩入冥思凡此  
數者皆達人雅士夙所欽懷雖則心侔跡殊所趣無  
間會替傳孫許之玄談廬阜接謝陶於白社宜其日



鍛月鍊志彌厲而道彌精佳句縱橫不廢禪定巖穴  
相邇更唱迭酬苦於三峽猿清同九皋鶴不其偉歟  
與夫迷津畏途埋玉世慮蓄積於心發在篇詠者未  
可同年而論矣然道或淺深價有輕重未能悉採其  
喬松於灌莽野鶴於雞群者有靈一靈徹皎然清塞  
無可虛中齊已實休八人皆東南產秀共出一時已  
為錄寶其或雖以多而寡稱或著少而增價者如惟  
審護國文益可止清江法照廣宣無本修睦無悶太  
易景雲法振栖白隱巒處默鄉雲棲一淡交良又若  
虛雲表曇域子蘭僧鸞懷梵惠標可朋懷浦慕幽善

生亞齊尚顏栖蟾理瑩歸仁玄寶惠保法宣文秀僧  
泚清尚智暹滄浩不特等四十五人名既隱僻事且  
微真今不復喋々云尔

皇甫冉

冉字茂政安定人避地來寓丹陽耕山釣湖放適閑  
淡或云秘書少監彬之姪也十歲能屬文張九齡一  
見歎以清才天寶十五年盧庚榜進士調無錫尉營  
別墅陽羨山中太曆初王縉為河南節度辟掌書記  
後入為左金吾衛兵曹參軍仕終拾遺左補闕公自  
擢桂禮闈便稱高格徃以世道艱虞遂心江外故多



飄薄之歎每文章一到朝廷而作者變色當年才子  
悉願締交推為宗伯至其造語玄微端可平揖沈謝  
雄視潘張惜乎長轡未聘芳蘭早凋良可痛哉有詩  
集三卷獨孤及為序今傳

### 皇甫曾

曾字孝常丹之弟也天寶十七年楊儼榜進士善詩  
出王維之門與兄名望相亞當時以此張氏景陽孟  
陽協居上品載處下流侍御補闕文詞亦然體製清  
緊華不勝文為士林所尚仕歷侍御史後坐事貶舒  
州司馬量移陽翟令有詩一卷傳于世

### 獨孤及

及字至之河南人少角時誦孝經父試之曰尔志何  
語曰立身行道揚名於後世天寶末以道舉高第代  
宗召為左拾遺遷禮部員外郎歷濠館常三州刺史  
及性孝友喜鑑拔為文必彰明善惡長於議論工詩  
格調高古風塵迥絕得大名當時有集傳世○堂讀  
選中沈謝諸公詩有題新安江水至清淺深見危賒  
京邑游好及石門新堂所住四面高山回溪石瀨茂  
林竹及田南樹園激流植接齋中讀  
望所避客晚登三山還望京邑等數端皆奇崛精當  
冠絕古今無曾發其韞奧者逮盛唐沈宋獨孤及李



嘉祐章應物等諸才子集中往往各有數題片言不  
苟皆不減其風度此則無傳之妙逮元和以下佳題  
尚罕况於詩乎立題乃詩家切要貴在卓絕清新言  
簡而意足句之所到題必盡之中無失節外無餘語  
此可與智者商推云因舉而論之

### 劉方平

方平河南人自誓美容儀二十工詞賦與元魯山交  
隱居潁陽太谷尚高不仕皇甫冉李頎等相與贈  
答有云離過潁陽道竹外少姨峯神意淡泊善畫山  
水墨妙無前汧國公李勉延致齋中甚敬愛之飲薦

千朝不忍屈辭還舊隱工詩多悠遠之思陶寫性靈  
默會風雅故能脫畧世故超然物外區々斗臂何足  
以繫劉先生哉有集今傳

### 秦系

系字公緒會稽人天寶末避亂剡溪自稱東海釣客  
北都留守薛兼訓奏為倉曹參軍不就客泉湖南安  
九日山中有大松百餘章俗傳東晉時所植系結廬  
其上穴石為研註老子彌年不出時姜公輔以直言  
罷為泉湖別駕見系輒窮目不能去築室與相近遂  
忘流落之苦公輔卒妻子在遠系為營葬山下每好



義如此張建封聞系不可致請就加校書郎與劉長卿章應物善多以詩相贈答權德輿曰長卿自以為五言長城系用備師攻之雖老益壯年八十餘南安人思之號其山為高士峯今有麗句亭在焉集一卷今傳

### 張衆甫

衆甫京口人隱居不務進取與皇甫御史友善精廬楨近後各遊四方曾寄處士詩云伏臘同雞黍柴門閉雪天時宦亦有徵辟者守死善道卒不就衆甫詩婉媚綺錯巧用文字工於興喻文流中佳士也○同

在一時者有趙微明于姚蔣渙元季川俱山顛水涯苦學貞士名同蘭芷之芳志非銀黃之術吟詠性靈陶陳東素皆有佳篇不能湮落惜其行藏之大槩不見於記銀故錄其考詳焉

### 嚴維

維字正文越州人初隱居桐廬慕子陵之高風至德二年江淮選補使侍郎崔渙下以詞藻宏麗進士及第以家貧親老不能遠離授諸暨尉時已四十餘後歷秘書郎嚴中兼節度河南辟佐幕府遷餘姚令仕終右補闕維少無宦情懷家山之樂以業素從外斗



之祿聊代耕耳詩情雅重挹魏晉之風鍛鍊鏗鏘庶少遺恨一時名輩孰匪金蘭詩集丁卷今傳

### 于良史

良史至德中仕為侍御史詩體清雅工於形似又多警句蓋其珪璋特達早步清朝興致不群詞苑增價雖平生似昧而篇什多傳

### 靈徹上人

靈徹姓湯氏字澄源會稽人自童子辭父兄入淨戒行果潔方便讀書便覺勤苦授詩法於嚴維遂籍々有聲及維卒乃抵吳興與皎然居何山遊講因以書

薦于包侍郎佶得之大喜又以書致于李侍郎紆時二公以文章風韻為世宗貞元中西遊京師名振黃下緇流疾之遂造飛語激動中貴因誣奏得罪徙汀洲會赦歸東越時吳楚間諸侯各賓禮招延之元和十一年終於宜洲開元寺年七十有一門人遷歸建塔於山陰天柱峯下上人詩多警句能倫衆體如芙蓉寺云經來白馬寺僧到赤烏年謫汀洲云青蠅為予客黃耳寄家書性巧逸居沃洲寺嘗取桐葉剪刻製器為蓮花漏置盆水之上穿細孔漏水半之則沈每晝夜十二沈為行道之節初居嵩陽蘭若後來



住匡廬東林寺如天目四明棲霞及衡湘諸名山行  
錫幾遍掌與靈一上人約老天台未得遂志雖結念  
雲磴而才名拘牽聲息經微吟諷無巨所謂按乎其  
華遊方之外者也有集十卷及錄大曆至元和中名  
人酬唱集十卷今傳

### 陸羽

羽字鴻漸不知所生初竟陵禪師智積得嬰兒於水  
濱育為弟子及長耻從削髮以易自筮得蹇之漸曰  
鴻漸干陸其羽可用為儀始為姓名有學愧一事不  
盡其妙性恢諧少年匿優人中撰談笑萬言天寶間

署羽伶師後遁去古人謂繫其行而穢其跡者也上  
元初結廬苕溪上閉門讀書名僧高士談讌終日貌  
寢口乞而辯人善若在已與人期雖阻虎狼不避也  
自稱桑苧翁又號東園子工古調歌詩興極閑雅著  
書甚多扁舟往山寺唯紗巾藤鞋短褐犢鼻擊林木  
弄流水或行曠野中誦古詩裴回至月墨興盡慟哭  
而返當時以比接輿也與皎然上人為忘言之交有  
詔拜太子文學羽嗜茶造妙理著茶經三卷言茶之  
原之法之具時號茶仙天下益知飲茶矣鬻茶家以  
瓷陶羽形祀為神買十茶器得一鴻漸初御史大夫



李季卿宣慰江南喜茶知羽召之羽野服藜具而入  
李曰陸君善茶天下所知揚子中冷水又殊絕今二  
妙千載一遇山人不可輕失也茶畢命奴子與錢羽  
愧之更著毀茶論與皇甫補闕善時鮑尚書防在越  
羽往依焉舟送以序曰君子究孔釋之名理窮歌詩  
之麗則遠墅孤鳴通舟必行魚梁釣磯隨意而往夫  
越地稱山水之鄉轅門當節鉞之重鮑侯知子愛子  
者將解衣推食豈徒掌鏡水之魚宿耶溪之月而已  
集併茶經今傳

顧况

况字通翁蘇州人至德二年天子幸蜀江東侍郎李  
希言下進士善為歌詩性恢誕不修檢操工畫山水  
初為韓晉江南判官德宗時柳渾輔政薦為秘書郎  
况素善於李泌遂師事之得其服氣之法能終日不  
食及泌相自謂當得達官久之遷著作郎及泌卒作  
海鷗詠嘲諷權貴大為所嫉被憲劾貶饒州司戶作  
詩曰萬里飛來為客鳥曾蒙丹鳳借枝柯一朝鳳去  
梧桐死滿目鴟鴞奈尔何遂全家去隱茅山鍊金丹  
斗身輕如羽况暮年一子即亡追悼哀切吟曰老人  
喪愛子日暮泣成血老人年七十不作多時別其年



又生一子名非熊三歲始言在真漢中聞父吟苦不  
忍乃來復生非熊後及第自長安歸慶已不知况所  
在或云得長生訣仙去矣今有集二十卷傳世皇甫  
湜為之序

### 張南史

南史字季直幽州人工奕棊神筭無敵游心太極掌  
幅巾藜杖出入王侯之宅十年高談濶視慷慨奇士  
也中自感激始苦節學文無希世苟合之意數年間  
稍入詩境調體超間情致兼美如并燕老將氣韻沉  
雄時少及之者肅宗時廟堂獎拔仕為左衛倉曹參

軍後避亂寓居揚州揚子平難再召未及赴而卒有  
詩一卷今傳

### 戎昱

昱荆南人美風度能談少舉進士不上乃放遊名都  
雖貧士而軒昂氣不消沮愛湖湘山水來客時李夔  
廉察桂林寓官舍月夜聞隣居行吟之音清麗遲明  
訪之乃昱也即延為幕賓待之甚厚崔中兼亦在湖  
南愛之有女國色欲以妻昱而不喜其姓戎能改則  
訂議昱聞之以詩謝云千金未必能移姓一諾從來  
許殺身自謂李大矢恩私至深無任感激初事顏平



原掌佐其征南幕亦累薦之衛伯玉鎮荆南辟為從事歷夏州刺史至德中以罪謫為辰州刺史後容劍南寄家隴西數載憲宗時邊烽累急大臣議和親上曰比聞一詩人姓名稍辟者為誰宰相對以冷朝陽包子廬皆非帝舉其詩對曰戎昱也上曰掌記其詠史云漢家青史上拙計是和親社稷依明主安危託婦人豈能將玉貌便撥淨沙塵地下千年骨誰為輔佐臣因笑曰魏絳何其懦也此人如在可與武陵桃花源足稱其清詠士林榮之昱詩在盛唐格氣稍劣中間有絀似晚作然風流綺麗不虧政化當時賞音

喧傳翰苑固不誣矣有集今傳

### 古之奇

之奇寶應二年禮部侍郎洪源下及第與耿漳同時嘗為安西幕府書記與李司馬端有金蘭之好工古調足幽閑淡泊之思婉而成章得名藝圃不泛然矣詩集傳於世

### 蘇渙

渙廣德二年楊栖梧榜進士本不平者往來剽盜善用白弩巴賓商人苦之稱曰白跖後自知非折節從學遂成名累遷待御史湖南崔中羨瓘辟為從事瓘



遇害繼走交廣肩動哥舒是跋扈如蛟龍見血本質  
 彭矣居無何伏誅初嘗為變律詩十九首上廣州節  
 度李勉其文意長於諷刺亦有陳拾遺一鱗半甲故  
 加待之或曰此子羽翼嬖臣侵敗王畧今尚其文可  
 歟勉曰漢策載蒯通說薛皇史錄祖君檄草此大容  
 細者善惡必書春秋至訓明言不廢孟子格談渙其  
 庶乎豈但存雕蟲小技亦以深懲賊子也時以為名  
 言杜甫有與贈荅之詩今悉傳

朱灣

灣字臣川大曆時隱君也號滄洲子卒履負素潛輝

不耀逍遙雲山琴酒之間放浪形骸繩檢之外郡國  
 交徵不應工詩格體幽遠與用弘深寓意因詞窮理  
 盡性尤精詠物必含比興多敏捷之奇及李勉鎮東  
 平嘉其風操厚幣邀來署為府中從事日相談讌分  
 逾骨肉久之掌謁湖州崔使君不得志臨發以書別  
 之曰灣聞蓬萊山藏杳冥間行可到貴人門無媒通  
 不可到驪龍珠潛混瀆之淵或可識貴人顏無因而  
 前不可識自假道路問津主人一身孤雲兩度圓月  
 載請執事三趨戟門信知庭之與堂不啻千里况寄  
 食漂母夜眠魚舟門如龍而難登食如玉而難得食



如玉之粟登如龍之門實無機心翻成機事漢陰丈  
人聞之豈不大笑屬溪上風便囊中金貧望其棠而  
歎自引然而退灣白遂歸會稽山陰別墅其耿介類  
如此也有集四卷今傳

### 張志和

志和字子同婺州人初名龜齡詔改之十六擢明經  
掌以策干肅宗特見賞重命待詔翰林以親喪辭去  
不復仕居江湖性邁不束自稱烟波釣徒撰玄真子  
二卷又為號焉兄鶴齡恐其遁世為築室越州東郭  
茅茨數椽花竹掩映嘗豹席櫻牖沿溪垂釣每不投

餌志不在魚也觀察使陳少游頗往候問帝嘗賜奴  
婢各一人志和配為夫婦號漁童稚青與陸羽嘗為  
顏平原食客平原初來刺湖州志和造謁顏請以舟  
敝欲為東之曰願為浮家泛宅往來苕霅間足矣善  
畫山水酒酣或擊鼓吹笛或筆輒就曲盡天真自撰  
漁歌便復盡之興趣高遠人不能及憲宗聞之詔寫  
真求訪并其歌詩不能致後傳一且忽乘雲鶴而去  
李德裕稱以為漁父賢而名隱鷓夷智而功高未若  
玄真隱而名彰方而無事不窮而達其嚴光之比歟







